

## COLOSSIANS

*Paul-hu Colossae ekaresia jejëmijade jöhoje.*

<sup>1-2</sup> O asë'e God-are aribövi Colossae amore raro-marujohumë biririvoromo Keriso uehorovaruje ö mueno'e jëve hu'o gemuore bimuvorovë'ëro. God-ro nimamu Iesu Keriso-are apostle jevë'ëro Paul na'o nosi öho Timothy'o noro jemesi örire jejëmijö. No nague God nosi Vavuohuro huë baeromo ajëmijego maro raromo'irarijego.

*Paul-hu Colossae ekaresia jabesi jöëni uehorovoromo God rajahiromo ëninamade jöhoje.*

<sup>3</sup> Jemëni uehorovoromo pari vaejë'iroho noro God nosi Bada Iesu Keriso-are Vavu hesi örire huë mae uavarujeje. <sup>4</sup> Rabëni hesi bëhoho iae no hejareje uvavamu: Colossae aribövioho jemëro Iesu Keriso mae uehorovë'i God-are aribövie aho'obëhe huë baejëvaruje höjo. <sup>5</sup> Jemë ëhi ë'aruje hesi bëhoho jemëro uvarujeje: Huë mae bae'iröhe ajoho ö'idöre rune vaejahuë'e höromo raromoromo muebejarujeje ijonö biroho'irarijëro. Ëhi mae biroho'irarije jöho mami'e aehu Keriso-are jö ma hesi bëhi mae majëhijarevare evare jemë hejarijeje. <sup>6</sup> Jemesirire jiajëhi ëhi sa'ae aho'obëhe maja rojomajire beva'ajire ë jö maho majëhijego ae aho'obëhe ejahuobe marëbe va'ajeje. Ëhi jië'e mu maho jemesirohu'o rumorovë'eje. Jemëhu jö heromo God-are huë ma baeromo hesi bëhi avoho

hejarije majare evare aevadeje. <sup>7</sup> Epaphras-ro ë jö maho aevoli jemë majëhijadeje. Epaphras noro uehorovarue aëro jië'ëro no'o bimuvoromo Badare muoho vaejahajeje. Huro no'o röromo jemesirire muoho biririvoromo ajëmijajeje. <sup>8</sup> Huro uövuadeje: God-are Aru'ahëro jemesi dë vövöbajo'oho huotovëh'ëro ae huë baejëvo avoharuje höjo. Jemesi jöho ëhi majahuijamu hejareje.

<sup>9</sup> Iae ëhuni jemesi jö hejarevare evare no aevoromo jemëni God-are örire uehorovobe rovaroho jaruvoho ëhi gemuoho ë'obe va'arueje. Ëhi ë'obe va'oromo noro God uavarueje huro jemë avohëvego hesi Aru'ahëhu simano ma bojamuijaje ëhi jië'e simanoho jemë'o mabëhe baeromo mue aho'obëhe avoho garomo ëhuro ga barë'irarijego God-hu diehi nimajoho. <sup>10</sup> Ëhuro huhu nimajëhi jemëro ëhi vaejego Badaro jemë gëromo vuëvo avoho'iröhego. O jemë mu mae bövie bise'e vaeromo God bisemu gavarujoho gabe va'ojuvo ijonö ga avoho'irarijego. <sup>11</sup> Röhu God-hu aji mare hiromo bojamuijaje biriroho ëho jemëro bövi mae bae avohoromo ëhuro huë mae huë sisë rabe rovego nimorohë'i biririvoromo mae riravo'irarijego. <sup>12</sup> Mae riravoromo Vavuoho huë mae ua'irarijego rabëni huro jemë avohëvamu hesi ariböviehu aji'e öri ari'ere va'o raromoromo mae baejaruëhi ëho jemë'o bae'irarijoho eni jëv'ëro jië'ëro. Iae ëhuni no God ua gavarueje.

*Keriso aho'obëhe iosiramui'amaje a hesi aharire javuaje jöhoje.*

<sup>13</sup> Iae mae. God-ro no ajamuiromomo ramoramo hesi vöröre raromaroho jiovahuoromo rinaguoromo hesi Harihu mabēhi hesi aharire ramuē'eje. <sup>14</sup> Ramuē'ego hesi Harihohuro i'u'e mu sisēho tugohahuo'i hesi sasohē'e mu maho jiovahuoromo sisēho mu'uvahuadeje.

<sup>15</sup> Sisē mu'uvahuade aho Keriso God bogo gavarue a jiajēhi hu ēhi jiē'ēro no hu garomo uvarueje: God ēhi hōjo. Hu Murioho jiē'ēro God-hu bamade bövioho bise'oho iosiramui'amoromo hu simanohoje. <sup>16</sup> Ēhesi bēhoho God-ro Keriso uavamu huro bövioho bise'oho avoho'amadeje. Ō'idöre jiajohu'o sa'are jiajohu'o nunehu ga'amaruohu'o bogo ga'amaruohu'o simano vaeruomaje aru'aho masijohu'o vörö baeruomaje aru'aho masijohu'o aho'obēhe God-ro uavamu avoho'amo barējadeje hesi muebe'amoröhēni. <sup>17</sup> Bövi bise'oho bogo bamadevaroho Keriso hu urimo jiadeje. Huro aho'obēhe mueberomo ma'eno titimajeje. <sup>18</sup> Hu ekaresia nosi simanohoje no ma-hesi övo duruajo'e javuē'ēro. Hu ekaresia nosi bēhohoje. Hu aevo'i guomoromo ri'ōjadeje ēhuro aho'obēhe iosiramui'amoromo huro urimo nuniroho jioröhēni. <sup>19</sup> God-ro nimamu Kerisoro hesiro daruge uehore bövie bise'e bae barējē'eje. <sup>20</sup> God-ro ēhi nimē'ēro uvadeje: Na negajējo Kerisoro aho'obēhe nasinō sō rovego na'o huē mae jioruomorōhego. Kerisoro korosire iromoromo kōe rueromo guomego ēhuro God naro buore vaeromo bövie bise'e sa'are o ō'idöre jio'amajoho avoho'amego na'o huē mae garorovē'i raromorōhego. Na ēhi negajējo.

21 Röhu urimoho jemëro sisë'i uehorovoromo sisë vaejamu mue gö jëvë'ëro God-ariroho hahagu tariö'örovë'e jëvanovoromo God nu huodivaruje aribövie jëvadeje. 22 Jaruvoho bogo God nu huodivaruje aribövioho jëvo'i a'i God-ro hesi Harihoho nugö'öjamu sino haho'e jioromo guomamu ëhuro God-ro jemë buore vaejëvoromo agane vaejëvadeje ëhuro jemë övövo rumo'e jö sisë rumo'e jëvo'i ma-maemu jëvego va'o hesi nunire mae riravo'irarijego. 23 Hesi nunire ëhi mae riravo'i nëgë'oho mae uehorovaruje jöho ëhuremu birivoromo uehorovore. Urimo ë jö maho heromo uvarijeje: U'emu God'o gemu mae raromo'ëjarëjamu huë mae jëvobe rovadeje. Ëhi uehorovobe rovarijoho nadi vuonugore. Ëjö maho sa'ae aho'obëhe maja rojomajire beva'ajire aëro majëhibe jijihö barëjë'ejö. Röhu ë jö hesi muoho naro vaejajeje.

*Paul-hu ekaresia ajëminövade jöhoje.*

24 Naro jemë ajëmi'irodëni vi'ehi huë vavaeni bövi bise'o baebe rovodoho huë mae jeve. Noehu Keriso'o röromo bae'iröhe vi'ehoho ëho naro ajamiromo nasi sinore bae'i hirohajeje hesi sino haho'oho naehu uëvaje hesi bëhoho hesi ekaresiaho mae jëvoröhego. 25 Ekaresiae jemë mae jëvoröhego God-ro ekaresia ajëmi'irode muoho nasi örire bojemi'ijë'eje. Bojemiromo uevë'eje naro hesi jöho majëhi barë'irodego. 26 Majëhi'irode jöho urimo God-ro ae aho'obëhe subivëhobe rovadoho jaruvoho hesi aribövioho

röjahujië'eje garöhego. <sup>27</sup> Èjò urimo subivahuadoho God-ro hesi aribövioho röjahui'i nimateje noro garomo uvoröhego: Èjòho aji mabèhe jië'ëro sa'a gö gö raje aho'obèhe hebe va'oromo ma-mabèhe raromoruomo'ajëjo. Èjò hesi bëhoho Keriso jemë'o jie. Keriso jemë'o jië'ëro èhu'ëro uvarujeje: U'emu hesi aji mare ajio raromo'ëjarëjo. Jòho èhije. <sup>28</sup> Èhu'ëro jië'ëro Keriso-are jòho ae aho'o majèhijarueje. Majèhiromomo simane ma-mae uehorovoromo ae aho'obèhe röjëhibe jijiharueje jò bëhoho heromo avo'avoho uehorovoromoröhego. Avo'avoho uehorovobe va'oromo èhuro ae gemu gemu aho'obèhe Keriso-are ae gemuoho jioromo a duvahanö'e God-are nunire riravoröhego. <sup>29</sup> Èhi mae riravoröhego èhuni naro Keriso-are darugo bövi maho baeromo biririvoromo mu börömo böröme vaemu vaeromo hesi jòho röjëhijajeje.

## 2

*Sareri'e jö bogo ejèho'i Keriso-are jòhemu mae uehorovo'iröhe jòhoje.*

<sup>1</sup> Röhu na nege jemëro ave jòho ga'irarijego. Na muoho bogo bise'o vadu'oho vaejajeje èhuro jemë'o Laodicea amo rajohu'o nasi nu ano'o bogo gevarue a ioro'iorohu'o ajëmi'irodëni. <sup>2</sup> Naehu mu vaejaje hesi bëhoho na nege jemesi dë vövöbajo'ohu'o jabesirohu'o biririvèho'iröhego. Jemë'o jabu'o huë baerovoromo rajahirovo'irarijego. Jòho avoho heromo èhuro mae uehorovoromo uvo'irarijego: Jòho bogo sareri'ehu jio'i ma-mae

gemu hōjo. Ĕhuro God-hu urimo subivēhade jō hesi bēhoho Keriso-are jōho ga'irarijego. <sup>3</sup> Ae rahu Keriso-are bēhi gavē'oho Ĕhuro God-are nuni aji'e uehoro maho bōrōmo mae biroho'anue. Ĕhuremu jio'i biroho'irane ōre gō bogoje.

<sup>4</sup> Na Keriso-are jō Ĕhi uēvaje hesi bēhoho ae gōero jemē sarerēmiromo vuēvo'e jōho majēhijego mae hōromo ejēhojōēni uēve. <sup>5</sup> Rōhu na rori'o hi'i rōhu nasi uehoroho aho'o jemesirire jie. Ĕhuro na jemē'o jevanove. Jemē'o hijanovoromo gavaje jemē birivoromo gemuore riravoromo Keriso mae uehorovego gēromo nimorohajeje.

*Keriso-are ae gemuohuro javu'ēro Ĕhu'ēro bōvi bise'o eni javuego mae raromarue jōhoje.*

<sup>6</sup> Rōhu jemē aevoromo mae uehorovoromo uvarijeje: Iesu Keriso iae nosi bōrōmoho hōjo. Aevoromo hu mae uehorovarijēhi Ĕhi uehorovoromo hu'o gemu mae raromo jijihore. <sup>7</sup> Ije ō'e dirumu'ēro bibivajēhi o javu ōbehu bibivo'amajēhi Ĕhi Keriso-are jōro dirumunō'e io'amoromo bibivo riravore. Ĕhi'oromo rōjēhijamu hejarije jōho birivoromo mae uehorovobe hesi ōro mabēhe uabe va'ore.

<sup>8</sup> Rōhu aehu Ĕma sarerēmiromo uēvaruoho: Aveho nuni aji'e jō bōrōme hō uēvaruoho nadi ejēhoro guaro ho rireromanovore. Jabuhu atarue jōho ma-aēro jabesi uehorēro avohobe rovē'eje. Ave sa'a hesi jōhemu jiē'ēro Ĕhuro Keriso-are jōho ahajeje. <sup>9</sup> Ĕhuni jabesi jōho nadi ejēhore. Ĕhesi bēhoho God-hu diehi jiajoho iae Kerisoro hesi sino haho'ere bae barējē'eje.

<sup>10</sup> O aru'aho mue gö gö jemëhu baejëro God-hu nimajoho iae eni bae barëjë'e jëve Keriso-are ae gemuohuro jëvë'ëro Kerisoro simano vaeruo-maje darugo'e aru'ahe gö gö aho'o taemëvo'i huro gemuëro dö maroho jïë'ëro.

<sup>11</sup> Jemë Keriso-are ae gemuohuro jëvë'ëro ëhu'ëro jemesi sino sisëho tarivëhanovë'eje. Èhesi bëhoho bogo ma aehu Jew rajo muoho vaeromo sinoho tarivëhamu ëhuro God-are aribövie jëvo'i a'i Kerisoro jemesi sino hesi mu sisëho tarivëhë'eje God-are aribövie jëvoröhego. <sup>12</sup> Jemë bapataeto vaejarijevare evare Keriso guomamu hure bamarohuro ëhuro jemesi uehoro mamioho hu'o gemu mae guavëhë'eje ioro'ioeremu barëjëho'iröhego. Röhu God-ro darugoho bojamamu Keriso guomoromo ri'öjadeje. Èdarugoho jemëro mae uehorovoromo ëhuro Keriso'o gemu mae ri'öromomo uehoro i'oho baejarijeje. Bapataeto vaejarijevare ëhi jëvadeje. <sup>13</sup> Urimoho jemë mu sisëhemu uehorovonövarijeje. Mu sisëhemu uehorovoromo bogo Jew rajehu jëvo'i sa'a gö rajëro jëvë'ëro God-are jögoroho bogo baejë'ëro ëhu'ëro jemesi dë vövöbajo'oho vuovëvanovadeje. Jaruvoho God-ro jemë Keriso'o gemu mae ajëmamu i'ovoromo ri'öromomo uehoro i'e baejë'e jëve. Röhu God-ro nosi sisëho aho'o uehorovoromo vuonugahu'eje. <sup>14</sup> Urimo huro hesi jögoroho bojamuiromomo uövuadeje: Èhi ëhi ë'orëjo. Bogo ë'ë'oho i'ue bae'a'arujëjo. Èhi uöromomo gavade noro ë jögoroho ahamu gagorovo nosi ihoho jajivoromo uvadeje: Jabumë mu

sisë ëhi ëhi vaejë'ëro i'ue bae hesi jioruomajëjo. Ëhi ë'ë'ëro Keriso korosire guomadevare God-ro nosi sisëho uehorovoromo vuonugoromo nosi mu sisë jö surire jiajoho Keriso'o korosire ano taemoromo mu'uvahuadeje ëhuro mae javuoröhego. <sup>15</sup> Röhu majae gemuore Keriso korosire guomamu ëhuro aru'aho sisë ihe gö gö sa'a bövi bise'o muebe'amarue jabesi darugoho God-ro ruahö'ö'amoromo rori'o ujuoho ruruhö'öjadeje. Ruruhö'öromo ë sisë aribövioho söromo a nunire rovadeje ae aho'obëhe garöhego God-ro jabumë ruahö'öjävë'e jiego.

<sup>16</sup> Vörö'e aru'aho sisëhu ave sa'are muebejëvoruomadoho ruahö'öjävë'e jiaje ëhuni aehu ave sa'a hesi jögorohuremu uehorovoromo uëvaruoho: Ëioho jovoho bogave i'irarijëjo. ËJew rajo maja börömoho vadune göro göro manaere göro göro hurae göro göro ëhi rovego ëhi ëhi vaenövorëjo. Nosi jögoru bogo ejahuë'oho sisërejëvo'ajë uëvaruoho nadi ejëhore. <sup>17</sup> Ëhi jië'e jögorohuro ëhuro God-are mu maehu rue'iröhoho ëho no ma-sisë'i sisë'i maja aru'ahonö'e gavarueje. A'i Keriso gavë'ohuro ëhuro ë mu ma hesi bëhoho gavarueje. <sup>18</sup> Ëhuni aehu sarerëmiromo uëvaruoho: No nia'ovo'iraeromo mu masijo masije gavë'ëro ëhu'ëro a masije javuajëjo. Ëhuni uëvaruëjo: Jemesi arijo'arije taemorovorëjo. Aneraho uvene aho röjëhinövorëjo. Nosi jö bogo ejahuarujohuni sisëro vala'arujë uëvaruoho nadi ejëhore. Ëhi jië'e ariböviohuro sinehu nimaje mu sisëho uehorovoromo ma-döhemu nimoronimorohë'i



jijihoruomajeje. <sup>19</sup> Bogo biririvoromo Keriso mae uehorovoruomajeje. Röhu Keriso hu simanoho jio'i no hesi övo höru'oho javue. Hu simanoho jië'ëro muebejavuego övo höru'oho jarömi umuogëro darugoho baerovoromo gemuoro bimuvorovoromo God-hu ëhi ë'ojöro nimadëhi ëhi vaeromo böviraebe va'arueje. Ëhi jië'ëro Keriso nosi simanohoje röhu ë sisë aribövioho bogo biririvoromo simanoho Keriso'o gemuoroho bimuvorovoruomajeje.

*Keriso'o gemu mae vuovanovoromo mu mami vuonugo'i hu'o gemu mae ri'öromu mu i'o baejare jöhoje.*

<sup>20</sup> Röhu jemë Keriso'o gemu mae bimuvoromo vuovëvamu ave sa'a hesi mu jöho barëjêhadeje. Sa'a mu jö barëjêhadoho röhu jemë rabëni ave sa'a hesi mu uehorovarijoho bogo vuonugë'e ëhi gemuoho raromo jijiharujeje. Jemë rabëni aviëhi jië'e jöho ejëharujeje: <sup>21</sup> Aveho nadi ma'enorëjo. Ëho nadi irëjo. Aruëroho nadi rëhorëjo. <sup>22</sup> Ëhi jië'e jögoroho ma-i hesi jögore o inömo hesi jögoreje. I ijë'oho barëjajeje. O inömo baeromo mu vaejë'oho ëhuro ma-sisërë'amajeje. Ëhi sisërë'amoröhe inömo bövi bise'o hesi jögoroho ma-aëro bojëmiromu röjëhiruomajeje. <sup>23</sup> Röjahi'iramu uvo'a'anue: Jabesi jöho nani simano ma'e jöe höjo. Ëhesi bëhoho jaburo uvarueje: Uehore aho'o bojamiromu aru'aho masijoho uvene aho röjëhinövorëjo. Arijo'arije taemorovonövorëjo. Sino haho'oho ijumorovonövorëjo. Röhu jabesi jöho ma-döemu

maeje. Ejähë'ooho bogo ehuro sinehu nimaje mu sisëho aharueje.

### 3

<sup>1</sup> Röhu Keriso guomoromo ri'öjadohu'o gemu mae ri'öjê'e jëvaje ehuni Kerisohu God-are övo manö böröme hijajire döre jiaje muoho bövioho bise'ooho ehemu uehorovore. <sup>2</sup> Nadi ave sa'a hesi mu sisëho uehorovo'i döre jiajohemu ehemu uehorovore. <sup>3</sup> Jemesi mu sisë hesi darugoho ioro'ioremu barëjähë'eje. Ehuro vuovëvanovë'eje. Jemë vuovëvanovamu Keriso'o bimumvorovë'lëro jemesi darugo i'oho God-arire gurihijë'eje. <sup>4</sup> Ehi'obe va'ojuvo hujeji Keriso darugo bojëmijaje aho va'orahoro rue'lë'e. Rue'iramu evare jemëro hu'o va'orahoro riravoromo hesi ajoho gemu mae bae'a'aruje.

*Mu mami vuonugo'i mu i'o vaenövo'iröhe jöhoje.*

<sup>5</sup> Ehuni sinehu nimaje mu sisëho mu'ure. Öehu jijihanovarujoho va'inumi'e mu vaejarujoho jemesi dëre uehoro sisë ri'öjego nimarujoho ehi jië'e muoho mu'u'amore. Röhu avare inömemu nimaruje muoho mu'ure. Avare inömemu nimarue mu hesi bëhoho God dejonö bamo'i inömo sisë nuninö bamarue muohoje. <sup>6</sup> God-are jö bogo eruomaje ariböviohuro ehi jië'e mu sisëho vaeruomajego ehuni God-are vöröhuro jabumëni rue'lë'e. <sup>7</sup> Urimoho jemë'o ehi jië'e ariböviohu'o gemuore jijihoromo ehi jië'e mu sisëho vaenövariijeje.

8 Röhu avevejö'oho aviëhi jië'e mu sisëho aho'obëhe vuonugore. Dë vörönimarujoho vörö'iraejarujoho uehoro sisë baejarujoho ëhi ë'arujoho vuonugore. Ae gö jabesi iho ijumarujoho javoji'e jö sisë atarujoho bogave jemesi jö'oroho suorovo'i. 9 Nadi göëro göho sareramirovore rabëni hesi bëhoho uehoro mami jëvo'ego mu sisë vaenövarijoho vuonugo'i 10 uehoro i'e baejë'e jëvaje. Ëuehoro i'oho God-ro aevoromo bojëmajeje. Bojëmijë'ëro ë uehoroho huro avohëhobe va'ajeje huhu uehorovajëhi ëhi uehorovojöro ëhuro jemëro hu avoho ga'irarijego. 11 Uehoro i'ëro jëvë'ëro jemë bogo aho adovoromo uvo'a'arujë: Jew rajoho gö javuo'i sa'a ioro'ioro rajoho gö javuajëjo. Jew rajo mu vaeromo sino tarivahuë'e aribövioho gö javuo'i sino bogo tarivahuë'e aribövioho gö javuajëjo. Huë gö aribövioho o rori'ere aribövioho gö javuajëjo. O ae gö jabesi muemu vaejëharue aribövioho gö javuo'i nosi nimoro mu vaejarue aribövioho gö javuajëjo. Ëhi jië'e muoho iae barë'i jemë ae aho'obëhe Keriso-are aribövie gemuoho jëve. Hu ae aho'obëhe jemesirireje.

12 God-ro jemë hesi baejëvë'ëro jemë hesi aribövi maemu jëvego huro jemë dë vövöbajo'e aho'o uehorovëvajeje. Ëhuni huë baeromo a ajëmi'irarije muoho baere. Nadi sivuoho uehorovoromo bövioho riravo'i ma-sanuovoromo muoho vaere. Ae göehu huë sisë bojëmijë'oho biririvoromo ma-nunëremu ga taemore. 13 Göëro göho garomo nadi nuoho huodivorovo'i jabu'o ma-raromore.

O uvë'iroho: Ae göëro mu sisë vaejade hö uvë'iroho göëro gö hesi sisëho uehorovoromo vuonugore. Badahu jemesi sisë uehorovoromo vuonugadëhi jemë'o ëhi ë'ore. <sup>14</sup> Ëhi jië'e muoho vaejë'i röhu ave muohuremu avoho ma'enore. Göëro göho dë vövöbajo'e aho'o uehorovore. Dë vövöbajo'e aho'o uehorovë'o ho mu mae aho'obëhe avo'avoho vaenövo'aruje. <sup>15</sup> Röhu Kerisoro ajamuijego nosi dë vövöbajo'e mae javuego gemuoro mae raromarueje. Jemëro ëhi gemuoro mae rarom'irarijego ëhuni God-ro gagovëvadeje sino haho'e gemuoho jëvojöro. Ëhuni ë muohuremu nunoro bamoromo uvore: No muoho ëhi ëhi vae'ejarëjo. O God-hu suvuoro gö gö bojëmijajoho nadi ëma nunëremuoho ga'i uvore: God-ro suvuoro mabëhe bojamuijë'e hö uvore. <sup>16</sup> Röhu Keriso-are jöho mabëhe jiaje ë jöhuremu uehorovore. Ëjöho uehorovoromo simano mae bae avohoromo öroho röjahirovoromo jögore mamirovore. Ëhi'oromo uvore: God-ro mae vaejavuajë uvë'i Psalms surire jajivare jöho God rajahi'iröhe jöho Aru'ahehu bojëmaje jöe gö gö iore. <sup>17</sup> Jemë jö atë'o ho mu vaejë'o ho o rabe rabe ë'ë'o ho God Vavuoho Bada Iesuare ihore huë mae uavë'i mue aho'o Bada Iesuare ihoro vaenövore.

*Aehu diehi avo'avoho garorovo'iröhe jöhoje.*

<sup>18</sup> Röhu vaboroharo jemesi baru jabesi jöho ejëhonövore. Jö ejëhë'o ho iae maeje jemë Badare magonahëro jëvë'ëro.

<sup>19</sup> O baruoharo jemesi vaboroho rajëhire. Rajëhiromo nadi sisë'ioho vaejëvore.

<sup>20</sup> O aboji harihu'oharo jemesi vëmu vavu'o jabesi jöho aho'o ejëhonövore ëhi ë'ë'oho Badaro nimaje jiaje.

<sup>21</sup> O vëmu vavu'oharo aboji harihu'oho nadi huë sisëho bojëminövore. Huë sisë bojëmibe va'ë'oho jabesi uehoroho u'uhëho'ë'e.

<sup>22</sup> Ae gö jabesi muemu vaejëharuje aribövioharo jemesi masijoho ejëhonövore. Nadi ma-döemuoho ejëhorego jemesi masijohuro jemë gëromo mae uehorovëvo'irögoro a'i Bada uehorovoromo jabesi öroro uhohu'o mae ejëhonövore.

<sup>23</sup> Ejëhoromo mu rabe rabe vaejë'oho uvore: Bogo ma-a jabesi muoho vae'i na Badare mue vaejajëromo dë vövöbajo'e aho'o avoho uehorovoromo muoho vaere. <sup>24</sup> Mu ma vaejë'oho Badare ariböviehu bae'iröhe suvuoroho huro jemë'o mana bojëmi'ë'e. Ehuremu uehorovore. Ehësi bëhoho ae gö jabesi mu vaejë'oho ehuro Keriso jemesi bövi hesi muohu'o vaejarujeje. <sup>25</sup> O mu sisë vaejë'oho ë mu sisë hesi manaho bae'a'aruje. God-ro bogo gö nimo'i gö bijönimo'i a'i ma-gemu uehorovavuaajeje.

## 4

<sup>1</sup> O simano vaejaruje aribövioharo jemesi muemu vaejëhoruomaje aribövi jabesi öroro avo'avoho vaejëvore. Uvore: Bogo jabumëremu a'i no'o Simano Vaejavuaaje Ae iae ö'idöre jiajëjo.

*Biririvoromo God-are örire jö jövoromo mu avo'avoho vaenövo'iröhe jöhoje.*

<sup>2</sup> Röhu God-are örire jö atë'iroho nadi u'uvo'i a'i biririvoromo nune jioromo hesi öroro mabëhe

uaromo jöho atore. <sup>3</sup> God-are öroro jöho atoromo röhu nosi jöëni ëninamirego huro nosi öroho jiovahuo'iro no Keriso-are jö subivahuadoho ae huruoho majëhi'iröhe. Ëjö majëhijajohuni ëhuni aëro savoji gagore ba'amevë'ëro hijajeje. <sup>4</sup> Ëninamirego na ë jö hesi bëhoho avo'avoho huruoho majëhi'iro aëro ma-mae heruomoröhe. Naehu ëhi ë'lë'oho iae maeje.

<sup>5</sup> O Keriso-are jö bogo heruomaje ariböviohu'o gemuore raromë'iroho simanoho avoho uehorovoromo jabu'oho raromo jijihore. Jabu'o raromoromo röhu majae eni jiamu gavë'iroho nadi ëma raromo'i a'i biririvoromo jabesi öroro avoho ajëmire. <sup>6</sup> Röhu jemëhu jabu'o jö atë'oho jemëro vuëvo'e jö mahemu atore. Ëhi jië'e jö atë'oho ëhuro he'irarije aëro Keriso-are jö bëhoho he'i uë gëvamü hejël'oho ae gemu gemu avoho majëhibe va'a'aruje.

*Ijo tugoho'i jejëmijare jöhoje.*

<sup>7</sup> Tychicus-ro ö'oromo naehu rabe rabe ë'laje jöho majëhi'iramü he'a'aruje. Hu nosi huë baerovarue öeje. Hu no'o bimumvoromo Badare muohemu vaejahajeje. <sup>8</sup> Ëa naehu nugö'ö'ië'laje hesi bëhoho huro ö'oromo jöho majëhijego noehu diehi raromarue jöho jemëro hejego dë vövöbajo'oho mae jëvoröhego ëhuni nugö'ö'ië'laje. <sup>9</sup> Röhu Onesimus-ro Tychicus'o gemu mae ö'lë'e. Onesimus nosi huë baerovarue öhuro jië'ëro biririvoromo Keriso mae uehorovajeje. Hu jemesi ae gemuhoje. Tychicus'o Onesimus'o

niö'iro noehu rabe ë'aruoho majëhi barë'iramu he'a'aruje.

<sup>10</sup> Röhu na'o savoji gagore hijaje aho Aristarchus-ro jemesi örire jejëmiye. O Mark Barnabas-are muenohuro jejëmiye. Röhu Mark ö'ë'oho jejamiromo uare: Nosi osaro ro hijëjo. Ejöho na mami'e bojëmamu gavarijeje. <sup>11</sup> Röhu Joshua iho göho Justus hu'o jemesi örire jejëmiye. Aristarchus o Mark o Joshua ë Jew rajoho niö'i gemu jaburo sivue na'o bimuvoromo God-hu muebejaje öri ari'o hesi muoho vaejarueje. Vaeromo ma-mabëhe ajemijë'ejö. Jew rajo ioro'ioroho bogo ajemijarueje.

<sup>12</sup> O Epaphras jemesi ae gemuoho Iesu Keriso-are mu vaejahaje ahuro jemesi örire jejëmiye. Huro jemesi jöëni börömo mae biririvoromo God-are örire ëninamijajeje huro ajëmego jemëro a duvahonö'e biririvoromo riravoromo hesi jöho uhohu'o ma-mae hö uehorovoromo huhu rabe rabe nimajëhi ëhi ejaho barë'irarijego. <sup>13</sup> Ehi ëninamiromo mu börömo böröme vaejajeje jemë'o Laodicea amo rajohu'o Hierapolis amo rajohu'o ajëmi'iröhëni. Mu böröme vaejamu gavë'ëro naro majëhije. <sup>14</sup> Röhu oso muebejaje ae nosi huë baerovaruoho Luke o Demas jabu niö'iro jemesi örire jejëmijö.

<sup>15</sup> O Laodicea raromarue Christian ö mueno'ohu'o jejëmijode höre. O Nympha nasi Christian ma'ine o hesi osare ro gagovoruumaje ekaresiahu'o jejëmijode höre. <sup>16</sup> Röhu ave surire jö baeromo adahë'iroho suroho nugö'öromo Laodicea amo rajoho uëregö jabu'o adaho'irovo. O naehu Laodicea amore nugö'öjode suroho

jabuhu jemëni nugö'öjë'iroho jemë'o ëho adahore. <sup>17</sup> Röhu Archippus uare: Badahu bojamade muoho avo'avoho uehorovoromo vae barënëjo. Ëhi uane.

<sup>18</sup> Röhu ave jöho naro nasi övëro jajive gare. Paul naro jemesi örire jejëmiye. Na savoji gagore hijaje jöho nadi rumonimore.

God-ro jemë huë baeromo ajëminövo'ë'e. Ahia mino'e.



**God-are Jögoru I'oho**  
**The New Testament in the Omie language of Papua**  
**New Guinea**  
**Nupela Testamen long tokples Omie long Niugini**

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 3 Mar 2023 from source files dated 9 Oct 2020

a68769b4-6180-5825-a17e-676d8f6a7efa